

Tumačenje uklonilo dilemu oko imenovanja sudija Ustavnog suda



U pravnom tumačenju postupka imenovanja sudija Ustavnog suda Federacije Bosne i Hercegovine, koje je jučer dao visoki predstavnik Miroslav Lajčák, zaključeno je da predsjednica Federacije BiH Borjana Krišto mora izabrati kandidata sa liste koju je predložilo Visoko sudsko i tužilačko vijeće (VSTV). Osobe koje se ne nalaze na ovoj listi nisu kandidati i ne mogu biti nominirani na nivou Doma naroda Federacije BiH za imenovanje na funkciju.

Visoki predstavnik je jučer obavijestio predsjednicu Krišto o ovom tumačenju, ističući da Ustav Federacije BiH navodi da je predsjednik Federacije BiH nadležan za «imenovanje ... sudija Ustavnog suda», no takođe se navodi i da predsjednik Federacije BiH može razmatrati samo one nominacije koje su zasnovane «na prijedlogu kandidata koje je dostavilo Visoko sudsko i tužilačko vijeće.»

Visoki predstavnik je istakao da uloga VSTV-a nije samo u tome da predsjedniku i potpredsjedniku Federacije BiH omogući pokretanje procesa za dostavljanje vlastitih nominacija Domu naroda Federacije BiH. VTSV treba osigurati listu kvalificiranih kandidata iz koje predsjednik Federacije BiH odabire kandidata i upućuje prijedlog Domu naroda Federacije BiH na odobrenje.

Visoki predstavnik je istakao da je namjera Ustava bila da uključivanjem VSTV-a osigura da sudije Ustavnog suda Federacije BiH imaju potrebne kvalifikacije i iskustvo za

odlučivanje u kompleksnim pravnim predmetima i da sve osobe koje razmatraju predsjednik Federacije BiH, potpredsjednici Federacije BiH i Dom naroda Federacije BiH ispunjavaju minimum profesionalnih standarda za obavljanje tako važne funkcije.

U pismu, visoki predstavnik napominje da je izbalansirana zastupljenost konstitutivnih naroda osigurana na dva nivoa, prvo putem uslova da predsjednik Federacije BiH izvrši nominiranje u saglasnosti s potpredsjednicima a drugo, na osnovu činjenice da te nominacije mora odobriti i Dom naroda Federacije BiH.

Visoki predstavnik je izrazio nadu da ovo pravno tumačenje rješava probleme koji su se pojavili u vezi s imenovanjem sudija Ustavnog suda Federacije BiH.

Visoki predstavnik je dao ovo pravno tumačenje s obzirom da je uloga VSTV-a u imenovanju sudija Ustavnog suda Federacije BiH nametnuta Odlukom visokog predstavnika iz maja 2002. godine. Visoki predstavnik je jučer izjavio da «u okviru procesa u kojem lokalni organi vlasti u potpunosti preuzimaju odgovornost, svi zakonodavni organi u Bosni i Hercegovini trebaju usvojiti zakone i ustavne amandmane donesene korištenjem ovlasti visokog predstavnika. Zakoni koje su nametnuli moji prethodnici mogu biti izmijenjeni i dopunjeni ili inovirani tek kada ih usvoje nadležne zakonodavne institucije.»